

HEADLINES (EVENING)

1. Chakma Autonomous Dist Council inthlan vote tla chhiar zawh takah party mala sorkarna siam thei an awm loh avangin MNF leh BJP chuan sorkar in\awm siam an tum.
2. Sawhthing hralh chhuah theih nan vawiin khan Finance Minister Pu Lalsawta hovin ruahmanna siam a ni.
3. Prime Minister Narendra Modi chuan vawiin khan National Panchayati Raj Day denchhenin Madhya Pradesh-a Mandla district-ah Rashtriya Gram Swaraj Abhiyan a hawng.
4. Vawiin khan Karnataka Assembly inthlan tura chuh tumte hming pek luh theih hun chu khar a ni.

<><><>

CADC:

Chakma Autonomous District Council (CADC) inthlanpui result puan a nih hnuah MNF leh BJP in sorkar in\awm siam turin hma an la mek.

CADC inthlanah hian MNF Party chuan seat la tam berin MDC seat 8 an la a. INC-in seat 6 lain, BJP-in seat 5 an la a. Party mala sorkarna siam thei an awm loh avangin MNF leh BJP chuan sorkar in\awm siam an tum a ni.

Hemi chungchangah hian MNF President Pu Zoramthanga chuan an party tan Congress thawhpui a rem lo a, NDA-a member an nihpui BJP nena sorkar siam dun erawh chu \ha an tih thu AIR a hrih a. CADC-party pahnih Legislature party te'n kal zel dan tur an thlirho mek a ni, a ti.

BJP President Dr. JV Hluna pawhin thawhdunna tur chungchang hi AIR hrihin, Congress-in thawhdunpui atan a hnenah palai an tir vat naa Central lama an hotute'n Congress nena thawhdun chu rem an ti lo, a ti a. Helaiah MNF nen inbiakna nei lo mah se an hotute'n an lo biak tur thu leh naktukah an rawn kal dawn thu a sawi a ni.

Hetihlai hian CADC-a rorel mek Congress party chuan tichhe lutuka an inhriat loh thu an sawi. Chawngtea cham mek Congress CLP Treasurer Pu Zodintluanga'n he thu hi sawiin, an beisei ang an phak tak lohna chhan ber chu inthlan puan a nih hma chiaha Governor-in CADC sorkar \hiata Governor's Rule a puang chu a ni, a ti a. Sorkarna siam tura hma lak a nih dawn leh dawn loh thuah chuan Headquarters lama hotute thu an ngaihchan dawn thu a sawi a ni.

CADC inthlana Vote tlate hi vawiin khan Chawngte SDO (Civil) office-a counting hall pahnihah chhiar a ni a. Returning Officer Pu N. Chakhai chuan MDC constituency 20 zinga inthlan kalpuina bial 19-a vote hmu sang berte theuh chu tlingah a puang nghal.

CADC-a MDC bial 20 awmah Fultuli constituency-a inthlan result chu High Court order-in a stay rih a. MDC bial 19-a polling station 66-ah inthlan hi kalpuin vote nei zawng zawng 29,444 a\anga mi 27,038-in vote an thlak a, vote tla hi zaa 91.83 a tling a ni.

Vote chhiar chungchangah hian Complaint bial-11ah a awm a, an chhiar nawn vek a, result danglam a awm lo a ni tih kan corr chuan a sawi.

CADC inthlanah hian inhnehna sang ber chu Parva bialah a ni a. INC candidate Mohan-a chuan amah hnaih bertu BJP candidate Prityrup Chakma chu vote 314-in a hneh a. Vote inthlahna hniam ber chu Mondirasora bialah a ni a, INC candidate Onish Moy Chakma chuan amah hnaih bertu BJP candidate Lokhi Dhan Chakma chu vote 6-in a hneh a ni. Bial 19 zingah hian Borapansury-II bialah chuan BJP hmeichhe candidate Kusum Lota Chakma thlan tlin a ni.

CADC-ah hian MDC ni lai mi 17 chu ding nawn lehin, mi 6 chu thlan nawn an ni a, mi thar 13 an tling bawk.
(Lawngtlai PTC & Corr.)

<><><>

MIN. PU LALSAWTA – GINGER MARKET

Sawhthing chingtuten an sawhthing tharchhuahte an hralh chhuah zung zung theih nan vawiin khan Finance Minister Pu Lalsawta hovin ruahmanna siam a ni.

Ruahmanna siamtute chuan Sawhthing hralhna \anpui turin Primary Agriculture Credit Societies (PACS) 23 ten chak takin hma la se, an ti a. Mizoram Agricultural Marketing Solution (MAMSOL) te, Aggregator leh Entrepreneur ten awlsam zawka sawhthing hralhna an buatsaih theih nan a \ulna apianga hman tur sum ruahman nise tiin ruahmanna kalpui dan tur chipchiar takin an rel bawk a. Ruahmanna chak taka enkawla hma la turin Technical Committee din a ni dawn bawk a ni.

Sawhthing hralhna tur ngaihtuahhonaah State Planning Board Vice Chairman Pu H. Liansailova; Planning Secy. Dr. C. Vanlalramsanga; Commerce & Industry Secretary, Horticulture Secretary, Mizoram Cooperative Apex Bank Chairman, Finance, Planning, Commerce & Industry, Horticulture, Agriculture, Mizoram Agriculture Crops Growers and Marketing Society (MACGAMS) Chairman leh Secretary te, Mizoram Entrepreneurship Network leh Zospice International hotute an tel a ni.

(IPR)

<><><>

EDU-FEST STARTS

Zirlaite'n an kal leh zelna tur kawng an hriat theih nana inkawhhmuhna hun Edufest vawi 16-na chu vawiin khan Assembly Annex basement-ah Mizoram Journalists' Association President Pu Zonunsanga Khiangte in a hawng.

MJA President chuan Edufest kaltlang hian zirlai tam takin senso tlem zawkin zirna in \ha tak takah seat an lo hmu tawh \hin tih a sawi a. Tun \umah pawh zirlai leh \halaiten he Edufest hi an chhawr tangkai leh ngei a ring tih a sawi.

Zalen leh Lynchpin buatsaih Edufest-ah hian zirna in hrang hrang - India ram chhung leh ram pawn a\angte bakah bank officer zir theihna kawng inhawn dan leh educational loan chungchangah bank pahnih - Mizoram Cooperative Apex Bank Ltd. leh Mizoram Rural Bank ten stall an hawng a, a vaiin stall 18 hawn a ni a. Heng zingah hian Singapore a\angin institution pahnih leh Canada a\angin institution pakhat an tel a ni.

Edufest buatsaihtute chuan tun \umah hian phai lam college leh university chungchang information hrang hrang zawh theih a ni

tih an sawi a. Scholarship, students loan, admission leh a dangte course hrang hrang a awm tih an sawi a ni.

16th Edufest hi a nikhatnaah hian zirlai leh zirlai nu leh pa engemawzatin an tlawh a. Naktuk chawhma dar 11 a\anga tlai dar 5 thleng neih zawm a ni ang.

(Corr)

<><><>

HEALTH MINISTER AT KOLASIB

Cancer leh natna chi hrang hrang inkaichhawn theih loh chi miin an vei leh vei loh inentirna hun vawiin khan Health Minister Pu Lal Thanzara'n Kolasib Diakkawn YMA Hall-ah a hawng.

Cancer leh NCD screening mela hi Ministry of DONER bultumin Mizoram sawrkar Health Department, Swasth Uttar Purv, Public Health Foundation of India leh National Health Mission Mizoram-te huaihawt a ni a, Mizoram District zawng zawngah kalpui tur a ni a, vawiinah khan Doctor \hahnem tak thutchilhna hnuaiah mi 500 chuang a thlawnin an inentir a, damdawi pawh a thlawna sem nghal a ni.

Health Minister hian Kolasib District Hospital ah mipuiten man tlawm zawka damdawi an lei theihna tur Damdawi dawr Jan-Aushadhi Kendra Store leh NEDP sum hmanga Kolasib District Hospital tihchangtlun nana ruahman Cheng Nuai 94 Sing 9 Sang 8 leh 400 senga Damdawi In-a hman tur khawl chi hrang hrang 22 lei te a hawng baw a. Cheng Vbc 4 leh Nuai 9 chuang sengin Kolasib-ah Trauma Centre sa tura ruahmanna kalpui mek a nih thu a sawi.

(IPR)

<><><>

PM MODI TO LAUNCH RASHTRIYA GRAM SWARAJ ABHIYAN TODAY

Prime Minister Narendra Modi chuan vawiin khan National Panchayati Raj Day denchhenin Madhya Pradesh-a Mandla district-ah Rashtriya Gram Swaraj Abhiyan a hawng. He scheme hian a tum ber chu e-Panchayat Mission Mode Project hnuaia inzirina, hmasawna ruhrel din, e-governance atana hmalakna a ni a.

Pu Modi hian hmansanga tlangmite nunzia leh thilhlute vawnnunna tura ni thum awh hun hman tur Aadi Mahotsva a hawng baw a. Vawiin vek khan Pu Modi hian National Panchayati Raj Day denchhenin ramchhunga Panchayati Raj aiawhte hmaah thu a sawi a, ram sum ruahmanna budget chuan mitin huapzoa hmasawna thlen a tum ber thu leh thingtlang lam hmasawna turin sawrkarin chhum lo chatloin hna a thawk a ti a. Vawiina aiawh lo tel te chu thingtlang khua leh a chhunga chengte thuamchak turin sawrkar laipuiin nasa takin a pui dawn a ni a ti. Pu Modi chuan thingtlang khuate siamthat an nih hunah India chu siamthatin a awm ang a ti baw.

(Newsonair)

<><><>

5.5 MAGNITUDE EARTHQUAKE HITS PARTS OF ASSAM AND SOME OTHER AREAS OF NORTH EAST

Tukin khan Assam leh achhehvel hmarchhak bialah magnitude 5.5-a nain lir a nghing. Lirnging intanna hmun hi India leh Myanmar inrina laiah a ni a, zing dar 9:42 khan lir hi a nghing nia thudawn a ni a. Bungraw chhia leh thihna a thlen thu dawn a la nilo..

(Newsonair)

<><><>

**KARNATAKA ASSEMBLY ELECTION: LAST DAY TO FILE NOMINATIONS
TODAY**

Vawiin khan Karnataka Assembly inthlan tura chuh tumte hming pek luh theih hun chu khar a ni a. Thlaleh ni 12 khian vote thlak a ni ang. Inthlanah avaiin chuh tum mi 1127 an inziaklut tawh a. Chief Minister Siddaramaiah chuan Badami biala ding turin vawiin khan a hming a pe a, hemi hma hian Chamundeshwari bialah a hming a lo pe tawh bawk a ni. Congress atangin chanchinbumi ni thin Ravikumar Ganiga chuan vawiin khan a hming a pe ve bawk. Hetihlai hian BJP chuan bial pariata an candidate turte hming an puangchhuak a, hetah hian mi 52 awmin vawiin khan chuh turin an inziaklut nghal a ni.

(Newsonair)

<><><>